

通典卷第一百五十五

唐京兆杜佑君臣纂

兵八

孫子曰銳卒勿攻強而避之

避其所長也彼府庫充實士卒強盛則當謹避以待

其虛欲以弱制強不可支也

少而逃之

高壁壘勿與戰也彼衆我之師寡不可敵則軍自逃以匿

其不若則能避之

引兵備之強弱不敵勢不故小敵之相若則引軍避待利而動

堅大敵之擒

小不能當大也言小國不量其力敢與大邦爲仇雖權時堅城固守然後必見擒獲

春秋傳曰旣不能強又不能弱所以敗也

無邀正正之旗無擊堂堂之陣此

理變者也

正正者整齊也堂堂者盛大之貌也正正者孤特之象也言敵前有孤特之兵後有堂堂

之陣必有倚伏詐誘之謀審察以待勿輕邀截也此理變詐

是故朝氣銳晝氣惰暮

氣歸善用兵者避其銳氣擊其情歸此理氣者也

避其精銳

之氣擊其懈情欲歸此理氣者故曹劌曰夫戰勇氣也一鼓作氣再而衰三而竭彼竭我盈故剋之

避銳

戰國魏武侯問吳起曰暴寇卒至掠吾田野取吾牛馬則如之何起曰暴寇之來必精且強善守勿應潛伏路傍暮去必醉朝乘重裝驍騎逐擊勢必莫當過我伏內如雪逢湯○後漢末袁尚據鄴率兵圍擊兄譚於南皮留蘇油審配守曹公圍鄴尚還救鄴諸將皆以爲此歸師人自爲戰不如避之公曰尚從大道來當避之若循西山來者此成擒耳尚果循西山來臨湓

音爽

水爲營夜

遣兵犯圍公逆擊破走之城中崩潰○東晉末宋武帝
伐南燕慕容超嶺南賊盧循徐道覆乘虛襲建業循多
疑少決每欲以萬全爲慮謂道覆曰大軍未至晉吏部
尚書孟昶便覩風自裁大勢言之自當計日潰亂今決
勝負於一朝旣非必定之道且殺傷士卒不如按兵待
之宋武奔還拒守宋武曰賊若新亭直上且當避之回
泊蔡洲乃成擒耳於是登石頭城以覩循軍初見引向
新亭宋武顧左右失色旣而回泊蔡洲道覆猶日日欲
上循禁之使羸老悉乘舟艦向白石宋武慮其從白石
步上乃率劉毅諸葛長民北出拒之賊遂率衆數萬屯

丹陽郡宋武率諸軍馳歸衆慮賊過江咸謂當逕還拒戰宋武乃先引軍還石頭衆莫之曉是日大熱三軍疲頓旣入城解兵息士洗浴飲食久之乃出列陣於南塘參軍褚叔度朱齡石率勁勇千餘人過淮賊數千皆長刀矛鋌刃甲耀日奮躍爭進齡石所領多鮮卑善步稍並結陣以待之賊短兵弗能抗死傷者數百人乃退走堅壁持久候隙破之

蜀先主率大衆東伐吳吳將陸遜拒之蜀主從建平連營至夷陵界立數十屯以金帛爵賞誘動諸夷先遣將吳班以數千人於平地立營欲以挑戰諸將皆欲擊之

遜曰備舉軍東下銳氣始盛且乘高守險難可卒攻攻之縱下猶難盡克若有不利損我大勢非小故也今但且獎勵將士廣施方畧以觀其變若此間則是平原廣野當恐有焱音標沛交馳之憂今緣山行軍勢不得展自當疲頓於木石之間徐制其弊耳備知其計不行乃引伏兵八千人從谷中出遜曰所以不聽諸軍擊班者揣之必有巧故也諸將並曰攻備當在初今乃令入五六百里相銜持經七八月其諸要害已固守擊之必無利矣遜曰備是猾虜更嘗事多其軍始集思慮精專未可干也今住已久不得我便兵疲意沮計不復生犄角此

寇正在今日乃攻一營不利遜曰吾已曉破之之術乃
令各持一把茅以火攻破之俄爾勢成遂率諸軍同時
俱攻破四十餘營備升馬鞍山陳兵自繞遜督率諸軍
四面蹙之士崩瓦解死者萬數備因夜遁

堅壁挫銳

春秋時晉將欒書伐楚將戰楚晨壓晉軍而陣

壓窄其未備

軍吏患之裨將范匄音蓋趨進曰塞井夷竈陣於軍中而

疏行

戶郎反

首

疏行首者當陣前決開營壘為戰道

晉楚唯天所授何患焉

書曰楚師輕窵

土凋反

固壘而待之三日必退退而擊之

必獲勝焉終敗楚師○秦將王翦率兵六十萬擊楚楚

王悉國中兵以拒之王翦至堅壁而守之不肯戰楚兵
數出挑戰終不出王翦日休士洗沐而善飲食拊循之
親與士卒同食久之王翦使人問軍中戲乎對曰方投
石超距於是王翦曰士卒可用矣楚又數挑戰而秦不
出乃引而東翦因舉兵追之壯士擊大破楚軍鄢南因
而滅其國○漢景帝初吳王濞反總兵渡淮與楚戰遂
敗棘壁乘勝前銳甚梁孝王恐遣六將軍擊吳又敗梁
兩將士卒皆還走梁數使使報漢大將周亞夫求救亞
夫不許又使使惡烏路反亞夫於帝帝使人告之救梁亞
夫復守便宜不行梁使韓安國及楚死事相弟張羽爲

將軍

楚相張尚諫吳王而死

乃得頗敗吳兵吳兵欲西梁城守堅

不敢西卽走亞夫軍會下邑吳師欲戰亞夫堅壁不肯
戰吳糧絕卒饑數挑戰遂死奔亞夫壁亞夫終不出軍
中夜驚內相攻擾亂至帳下亞夫卧不起頃之復定吳
士卒多饑死遂以叛散○後漢更始初光武在河北擊
銅馬賊於鄴吳漢將突騎來會清陽賊數挑戰光武堅
營自守有出鹵掠者輒擊取之

鹵與虜同掠奪取之

絕其糧道積

月餘日賊食盡夜遁去追至館陶大破之受降未盡而
高湖重連賊從東南來與銅馬餘衆合光武復與大戰
於蒲陽悉破降之○魏末吳將諸葛恪圍新城司馬景

王使鎮東將軍母邱儉揚州刺史文欽等拒之儉欽請
戰景王曰恪卷甲深入投兵死地其鋒未易當且新城
小而固攻之未可拔遂命諸將高壘以蔽之相持數月
恪攻城力屈死傷大半景王乃令欽督銳卒趣合榆斷
要其歸路儉帥諸軍以爲後繼恪懼而遁欽逆擊大破
之斬首萬餘級○十六國前趙劉曜遣將討氐羌大酋
權渠率衆保險阻曜將游子遠頻敗之權渠欲降其子
伊餘大言於衆中曰往日劉曜自來猶無若我何況此
偏師自欲降乎遂率勁卒五萬人晨壓子遠壘門左右
勸出戰子遠曰吾聞伊餘有專諸之勇慶忌之捷士馬

之強人百匪敵其父新敗怒氣甚盛且西戎勁悍其鋒
不可當也不如緩之使氣竭而擊之此曹劌之勝也乃
堅壁不戰伊餘有驕色子遠候其無備夜分誓衆秣馬
蓐食先晨具甲掃壘遲

直吏反

明設覆而出戰擒伊餘於

陳盡俘其衆○宋桂陽王休範舉兵於潯陽已發東下
宋朝惶駭宋相齊高帝議曰昔上流謀逆皆因淹緩至
於覆敗休範必遠懲前失輕兵急下乘我無備夫應變
之術不宜在遠若偏師失律則大沮衆心宜頓新亭白
下堅守宮掖東府石頭以待賊至千里孤軍後無委積
求戰不得自然瓦解請頓新亭以當其鋒休範果敗○

大唐武德中太宗領兵征薛仁果於析

思歷反

塢

之恕反

城

有十餘萬兵鋒甚銳數來挑戰諸將咸請戰太宗曰我士卒新經挫衄銳氣猶少賊驟勝必輕進好鬪我且閉壁以拒之待其氣衰而後擊可一戰而破此萬全計也因令軍中曰敢言戰者斬相持者久之賊糧盡軍中頗攜其將翟長孫梁胡郎率所部相繼來降太宗知仁果心腹內離謂諸將曰可以戰矣令行軍總管梁實營於淺水原以誘之賊大將宋羅喉自恃驍悍求戰不得氣憤者久之及是盡銳攻梁實冀逞其志梁實固險不出以挫其鋒羅喉攻之愈急太宗度賊久疲復謂諸將曰

彼氣將衰吾當取之必矣申令諸軍遲明合戰復令將軍龐玉陣於淺水原南出賊之右以先餌之羅睺併軍共戰玉軍幾敗太宗親御大軍奄自原北出其不意羅睺回師相拒我師表裏齊奮呼聲動天羅睺氣奪於是大潰○武德中太宗率師往河東討劉武周江夏王道宗時年十七從軍太宗登玉壁城覩賊顧謂道宗曰賊恃其衆來邀我戰汝謂何如對曰羣賊鋒不可當易以計屈難與力競今深壁高壘以挫其鋒烏合之徒莫能持久糧運致竭自當離散可不戰而擒太宗曰汝意見暗與我合後賊果食盡夜遁追及介州一戰敗之

不戰挫銳

大唐武德中李靖隨河間王孝恭討蕭銑師至於清江
剋銑遣其將乘勝入北江銑悉兵以拒之孝恭將戰李
靖止之曰楚人輕銳難與爭鋒今新失荆門盡兵出戰
此救敗之師也非其本圖勢不能久一日不戰賊必兩
分留輕兵以抗我退羸師以自守此卽勢墮力弱擊之
必捷孝恭不從遣靖按營自以銳師水戰孝恭果敗奔
於南岸

河間達
之而敗

敵饑以持久弊之

後漢初河南賊董憲招誘五校餘賊步騎數千人屯建

陽去昌慮三十里光武親征至蕃

音反

去憲所百里諸將

請進帝不聽知五校乏食當退勅各堅壁以待其弊頃之五校糧盡果引去帝乃親臨四面攻憲三日大破之

○後漢王霸馬武旣破周建蘇茂營賊復聚衆挑戰霸

堅臥不出軍吏皆曰茂前日已破今易擊也霸曰不然

蘇茂客兵遠來糧食不足故數挑戰以徼

吉堯反

一切之

勝

徼要也一切猶權時也

今閉營休士所謂不戰而屈人之兵善

之善者也茂建旣不得戰乃引還營其夜建兄子誦反

閉城拒之茂建遁去誦以城降○後漢末青州黃巾衆

百餘萬入兗州界刺史劉岱欲擊之鮑信諫曰今賊衆

百萬百姓皆震恐士卒無鬪志不可敵也觀賊衆羣輩相隨軍無輜重難以抄掠爲資今不若畜士衆之力先爲固守使彼欲戰不得攻則不能其勢必離散然後選精銳兵據其要害擊之可破也岱不從遂與戰果爲所殺

劉岱違之而敗

○後漢末荀攸從曹公征張繡攸言曰繡與

劉表相恃爲強然繡以遊軍仰食表表不能供也勢必離不如緩軍以待之可誘而致也不從表果救之軍不利曹公謂攸曰不用君言至是

曹公違之而敗

○隋煬帝征高

麗九軍已渡鴨淥水糧盡議欲班師諸將多異同又不測帝意會高麗國相乙支文德來詣其營都將宇文述

不能執文德逃歸述內不自安遂與諸將更進追擊時
文德見軍中多饑色欲疲述衆每鬪便北述一日之中
七戰皆捷旣恃驟勝又內逼羣議於是遂進逼平壤城
文德僞降述料攻之未可卒拔因而班師文德隨擊之
大敗

文德七戰七北遷延令敵饑疲亦同持久之義

○隋末宇文文化及弒煬帝

後率兵來攻李密於黎陽密知化及糧且盡因僞與和
以弊其衆化及弗之悟大喜恣其兵食冀密饋之會密
下有人獲罪亡投化及具以告密情化及大怒其食又
盡乃渡永濟渠與密戰於童山之下自辰達酉密爲流
矢所中

丁仲反

頓於汲縣化及掠汲郡北趣魏縣其將王